



FACTVM DV PROCEZ

De Monsieur le Cardinal de la Rochefoucault,
Abbé de l'Abbaye de Sainte Geneviève du
Mont à Paris: & les Religieux de ladite Ab-
baye, demandeurs,

*Contre Frere Martin Citolle Curé de l'Eglise Saint Estienne, &
les Marguilliers de ladite Eglise, defendeurs.*

Et encor lesdits Religieux, Abbé & Conuent, defendeurs & de-
mandeurs.

Contre Monsieur l'Archeuesque de Paris, demandeur & defendeur.



LE differend qui est entre les parties au Conseil Priué du
Roy, ne procede que de ce que de part ou d'autre on se
méprend, en la difference qu'il y a entre les droicts pure-
ment Episcopaux, que ledit sieur Archeuesque peut pre-
tendre en l'Eglise Curiale de Saint Estienne, premiere fille
dependante de ladite Abbaye: & les prééminences & droicts honorifiques
que les demandeurs ont droict d'y auoir en consequence de ce qu'ils en sont
Superieurs, Curez primitifs, Patrons, Fondateurs, & Seigneurs temporels;
& que le Curé d'icelle, en qualité de Religieux de ladite Abbaye, est
suiet à leur iurisdiction spirituelle & temporelle, sauf en ce qui con-
cerne l'administration des Saints Sacremens, & le soin des ames, dont
il doit respondre audit sieur Archeuesque de Paris, & subir sa iurisdiction,
de laquelle il ne s'agit point, & ne desirent les demandeurs la contester.

C'est donc ce qui a esté cause que les defendeurs, pour donner sui-
et à la reuolte qu'ils ont faite contre ladite superiorité, afin d'abolir les droicts
de ladite Abbaye, & rendre ladite Eglise Curiale indépendante d'icelle,
& le Curé Religieux affranchy du vœu qu'il a fait entre les mains de ses
Superieurs, ont commencé à faire éclatter leur dessein le iour de la Feste-
Dieu en l'année 1638. que les demandeurs se dispoient de faire la Pro-
cession solennelle du Saint Sacrement de leur Eglise Abbatiale; par-
ce qu'ayant veu que l'Abbé Coadjuteur reuestu d'habits Pontificaux,
desiroit porter le Saint Sacrement entre ses mains pour plus gran-



de deference d'honneur, & obeir en ce faisant aux decrets & constitutions de la Saincteté du 2. Iuin 1618. touchant l'ordre de la Procession du Sainct Sacrement, ils s'en feroient offensez, sous pretexte que quelques années precedentes ledit Sainct Sacrement auoit esté porté sur vn brancart : de sorte que pour éuiter aux desordres que les defendeurs eussent deslors fait en ladite Procession, ledit Abbé Coadiuteur auroit esté contraint de consentir que pour ce iour il ne seroit rien innoué, & auroit esté faite comme auparauant sous la conduite & direction dudit Abbé, avec le Sainct Sacrement & Croix de l'Eglise Abbatale, le Curé de Sainct Estienne en son rang de Religieux sans estole, les Marguilliers sans baguettes ou autres marques d'autorité; & les Officiers de la Iustice temporelle de ladite Abbaye, suiuaus le Clergé d'icelle Abbaye.

Mais lesdits Curé & Marguilliers, ausquels ledit ordre & solemnitez de ladite Procession sont odieuses, ainsi qu'il paroist par leur inuentaie seruant d'aduertissement fol. 6. ont en l'an 1639. le mesme iour de la Feste Dieu, mis la coignée à la racine pour supprimer de tout point ladite Procession solennelle, & la reduire à vne particuliere de Sainct Estienne sous leur direction & conduite; & pour ce faire seroient entrez processionnellement avec le Sainct Sacrement & Croix de Sainct Estienne, les baguettes hautes à la main dans ladite Eglise Saincte Geneuiéue; & voyans que les demandeurs, particulièrement vn ancien Religieux de ladite Abbaye, Chancelier de l'Vniuersité de Paris, s'offensoient de cette nouueauté, le sieur Badran l'un desdits Marguilliers, promoteur de cette action, auroit imperieusement commandé audit Curé qu'il allast querir son estole, pour faire leur Procession à part. Ce qui obligea lesdits Religieux de demeurer en leur Eglise: & parce que ladite entreprise n'a esté faite qu'en indignation de la Reforme establee en ladite Abbaye, & porte mauuaise consequence, tant en ce qu'elle va à la suppression d'une Procession solennelle, qui estoit à la gloire de Dieu & l'edification des gens de bien, qu'en ce qu'elle tend à l'aneantissement des droicts qui appartiennent à vne Eglise de fondation du premier Roy Chretien, & qui a pour Patrone celle que la Ville de Paris a pris pour Protectrice. Les demandeurs pour ce suiet se sont pourueus deuant sa Majesté à sondit Conseil.

A ce qu'il plaise à sadite Maieité de les maintenir en l'autorité des droicts, qui dépendent de leur Superiorité. Et ordonner l'execution de deux contractz de fondations faites par les defuncts Abbez le Bel & Foulon en ladite Eglise Curiale, & en ce faisant qu'ils disposeront aux iours de Feste Dieu de l'ordre de ladite Procession solennelle du Sainct Sacrement, en laquelle assisteront les defendeurs sous la conduite & direction dudit Abbé, & autres Superieurs de ladite Abbaye, sans que lesdits defendeurs y puissent porter le Sainct Sacrement & Croix de Sainct Estienne, ny les Marguilliers de ladite Eglise leurs baguettes ou autres marques d'autorité, ny le Curé son estole, ny tenir autre rang que celuy de sa profession.

De maintenir aussi lesdits demandeurs es prerogatiues & droicts honorifiques qui leur appartiennent en ladite Eglise Curiale, tant pour ce qui concerne le service diuin qui y sera celebré par l'Abbé Saincte Geneuiéue aux festes du Patron, que pour ce

qui concerne les preſeances en ladite Eglise Curiale, aux enterremens où ils aſſiſteront en la preſence dudit Curé; & en l'autorité de donner la benediction au Predicateur qui preſchera en icelle Eglise, quand l'Abbé, Prieur, Souſprieur, ou autres Religieux y ſeront preſens.

Et pour ce qui regarde leſdits Marguilliers, qu'il ne pourra eſtre procedé à l'élection d'iceux qu'en la preſence dudit Abbé, & en ſon abſence du Prieur clauſtral, & autres anciens Religieux, qui à cette fin y ſeront appelez, ny l'adminiſtration du reuenu de ladite Eglise entrepriſe, qu'au prealable les Marguilliers eſleus n'ayent fait le ſerment entre les mains dudit Abbé, Prieur, Souſprieur, ou autres deſdits anciens Religieux en ſon abſence, pour icelle adminiſtration finie, en rendre compte pardeuant ledit Abbé, ou autres deſdits Religieux par luy commis.

Et au regard deſdites fondations, que ſuiuant le contract du 18. Octobre 1550. paſſé entre le feu ſieur le Bel & les Marguilliers Sainct Eſtienne touchant le Seruice y mentionné, l'Abbé Saincte Geneuiéue, & en ſon abſence le Prieur clauſtral commettra avec le Curé en la place des Chapelains decedez l'un des douze Preſtres habitez en l'Eglise Sainct Eſtienne, pour la celebration dudit Seruice.

Et que ſuiuant auſſi le contract du douziéſme Ianuier 1602. par lequel ledit ſieur Abbé Foulon a fondé deux cens liures de rente annuelle pour le Predicateur qui preſchera le Careſme en ladite Eglise, leſdits Marguilliers ſeront tenus nommer deux Predicateurs audit ſieur Abbé, & en ſon abſence au Prieur clauſtral, pour en choiſir celui des deux qui bon leur ſemblera.

Ces demandes ſont fondées tant és qualitez cy-deuant dites, qu'en la poſſeſſion immemoriable, qui a ſon origine en ſuite de ladite fondation Royale, par le moyen de laquelle l'Eglise Abbatiale eſt originairement Canoniale & Curiale, & n'a iamais eu autres Superieurs que les Abbez d'icelle, avec ce priuilege qu'elle eſt en toute choſe exempte du Diocéſain, & ne recognoiſt autre Superieur, tant en ſon chef qu'en ſes membres, que le Sainct Pontife de Rome: ſinon en ce qui concerne ledit Curé, ſur lequel Odo Eueſque de Paris a obtenu Iuriſdiction touchant ladite adminiſtration des Sacremens, & cure des ames, par conceſſion de l'Abbé & Religieux de Saincte Geneuiéue.

Mais les defendeurs qui ont iugé, que s'ils demeuroient d'accord de ladite Superiorité, & que ladite Eglise ſoit dépendante de ladite Abbaye, ou ait eſté partie d'icelle, ce ſeroit admettre leſdites prerogatiues, & droicts honorifiques; ont dénié le tout, & mis en faiçt par leurdit inuentaie fol. 3. recto, que les Religieux Saincte Geneuiéue entreprirent ſous l'Abbé Iean les droicts Curiaux & Parrochiaux ſur pluſieurs Eglises, nommément ſur l'Eglise Sainct Eſtienne du Mont: ce qui obligea ledit Odo Eueſque de les mettre en procez, ſur lequel il y eut tranſaction au mois de Iuin 1202. & qu'elle contient que les Abbez & Religieux reſtitueroient audit Eueſque de Paris le droict Epiſcopal en toute la Parroiſſe de Sainct Eſtienne; qu'en conſequence de cette reſtitution ledit Eueſque conſentit que le Curé (poſé qu'il fuſt Chanoine Regulier) luy ſeroit preſenté, & receuroit de luy la cure des ames; ce ſont les principales deſenſes des defendeurs, qui ne conſiſtent qu'en pures ſuppoſitions.

D'autant que ladite tranſaction reſpectiuement produite par les parties, eſt

4

interuenue apres vne sentence renduë par le Pape Innocent III. le premier chef de laquelle est rapporté par le chapitre *Olim. de restitutione spoliatorum* 17. lequel est iustificié qu'y ayant eu instance pardeuant ledit Pape, entre ledit Euesque Odo & Iean Abbé, touchant la iurisdiction Episcopale sur les habitans de la Parroisse du Mont, ledit sieur Euesque en fut debouté: & de faiët, par vne Requête que les defendeurs ont présentée à sa Majesté le 7. Feurier 1642. pour adiouster 29. pieces à leur production; ils alleguent que par ladite sentence par eux produite, ledit Euesque est indefiniment maintenu en la possession des droicts Episcopaux & Parrochiaux en la Parroisse de S. Estienne, à l'exception, que les Parroissiens demeureroient exempts des excommunications de luy émanées, & que l'institution & destitution du Curé de Sainct Estienne estoit delaisée audit Abbé: De sorte que par la reconnoissance mesme des defendeurs, ledit sieur Euesque n'auoit point de iurisdiction spirituelle sur lesdits Parroissiens; & l'ayant à present, il ne la tient que par concession qui luy a esté faite par les Abbé & Religieux de Saincte Geneuiéue, par ladite transaction, lors de laquelle le differend desdites parties estoit de tout point terminé. Et iustifie aussi ladite transaction que ladite Eglise Curiale appartient ausdits Religieux, & l'a ainsi reconnu ledit sieur Euesque, parce qu'il a traité avec eux comme seuls parties capables de ce faire; ledit traité passé, *inter dominum Odonem Episcopum & Ecclesiam Parisiensem ex vna parte, & Ioannem Abbatem & Ecclesiam Sanctæ Genouefæ ex altera, super querelis quas dictus Episcopus mouebat de iure parochiali in parochia de Monte, & procuracionibus quas in parochialibus Ecclesiis Canoniorum petebat, & è contra Canonici de Monte.*

De sorte que ledit sieur Euesque a reconnu que ladite Parroisse & autres appartennoient ausdits Religieux, & par consequent non vsurpées, & n'est point aussi parlé par ladite transaction de l'Eglise S. Estienne, parce que pour lors, & long temps du depuis, elle ne portoit autre nom que la Chapelle du Mont, & quand il estoit fait mention de la Parroisse, c'estoit la parroisse du Mont, ou la parroisse Saincte Geneuiéue: Ce qui a continué iusques au Pontificat de Iean XXII. comme il est iustificié par vne bulle dudit Pape, que les demandeurs ont produit en leur seconde production, & a tousiours esté ladite Eglise Curiale de seruié par l'un des Religieux de ladite Abbaye commis à cette fin par son Abbé, & non pas indifferemment par vn Seculier ou Regulier, ainsi que l'ont supposé les defendeurs en corrompant le sens de ladite transaction, comme ont fait lesdits Marguilliers celuy d'une bulle d'Alexandre III. pour ne pas reconnoistre que ledit Curé n'est qu'un Commis de ladite Abbaye. Mais parce que lesdits Abbé & Religieux auoient pretendu de n'estre point suiets à presenter leursdits Religieux audit sieur Euesque pour receuoir de luy ladite administration des Sacremens, par le moyen de leursdits priuileges, & que par leurs bulles ils ont le droict de commettre ledit Religieux; pour ce suiët, & pour ne plus tomber en ce differend, il est porté par ladite transaction, que *Presbyter qui illi parochiæ spiritualia pro tempore ministrabit, etiamsi sit Canonicus regularis presentabitur Episcopo, & ab eo curam recipiet animarum, & parochianos ipsius parochiæ ad mandatum Episcopi vel Archidiaconi citabit, vocabit, pariter & soluet.* Ce sont les termes concernans les droicts

droicts de ladite concession procedante dudit Abbé, qui ne sont pas généraux pour toutes sortes de droicts Episcopaux, comme le pretendent les defendeurs par leur dite requeste.

Dautant que où il est aussi dit, que *licebit Episcopo & Archidiacono in singulos de prædicta parochia & omnes, interdicti & excommunicationis ferre sententiam*, il y a vingt-six desdits Parroissiens seruiteurs de ladite Abbaye, sur lesquels l'Euesque n'a aucune iurisdiction Episcopale, & en sont aussi leurs femmes & familles exemptes, sinon pour le regard de six desdites femmes demeurantes hors l'enceinte de ladite Abbaye: *In his siquidem prædictis viginti sex personis, aut in illis quæ in locum eorum per Abbatem fuerint subrogata nullam Episcopus vel Archidiaconus potestatem habebit, nisi de eorum matrimonio separando agatur, illa enim causa pleno iure ad Episcopum & Archidiaconum pertinet: uxores autem prædictorum sex seruitorum in parochia de Monte extra Canonicorum septa manentium iurisdictioni Episcopi & Archidiaconi in omnibus spiritualibus subiacebant.* Dont s'ensuit que ladite iurisdiction Episcopale est limitée, à laquelle *nihil accrescit*, & qu'en icelle ledit Abbé a reserué pour preuue de son droict primordial la franchise de seldits seruiteurs & de leursdites familles, sauf lesdites six femmes qui n'y sont comprises par ladite reservation, laquelle de droict, *firmat regulam in cæteris*. Au preiudice dequoy Frere Martin Citolle (qui se veut plus donner d'autorité en son administration Curiale, que ledit sieur Archeuesque n'a de droicts Episcopaux en ladite Cure) s'y est porté avec telle passion, que depuis le procez il auroit violenté lesdits Religieux pour leur oster le corps d'un enfant du sieur Petit, Sommelier de Monsieur le Cardinal de la Rochefoucault Abbé de Sainte Geneuiève, & qui a mesme la garde de la porte de ladite Abbaye, & demeure dans l'enclos d'icelle, ainsi qu'il est iustifié par l'information qui en a esté produite audit procez sous la cote A.

Il est vray que ledit Curé & lesdits Marguilliers n'ont fondé leurs defenses que sur la dignité Episcopale, comme si elle concouroit entre eux & ledit sieur Archeuesque, ainsi qu'il se voit en toutes leurs procédures, & finalement par leur dite requeste, par laquelle ils disent auoir recouuert plusieurs pieces iustificatiues de leurs droicts; & neantmoins l'induction desdites pieces n'est que touchant la iurisdiction Episcopale, nommément ladite sentence du Pape Innocent, & prennent le mesme fondement pour estendre lesdits droicts Episcopaux pour en vsurper les prerogatiues, en accusant tacitement iceluy sieur Archeuesque de negligence, à ne pas entreprendre la recherche d'iceux: car il est sans difficulté qu'ils n'ont d'autres moyens, puis qu'ils les alleguent de leur chef, autrement ils diroient seulement que les pretentions des droicts que demandent lesdits Abbé & Religieux, ne regardent que ledit sieur Archeuesque, & qu'à leur regard ils n'y ont point d'interest: mais comme s'ils participoient à ladite dignité, ils font mesme directement contre l'intention des predecesseurs dudit sieur Archeuesque, qui ont tousiours reconnu que ladite Cure dépendoit de ladite Abbaye, & ont tous promis suiuant quantité d'actes qui sont produits, de n'entreprendre au preiudice des priuileges, exemptions & immunités de ladite Abbaye.

Et quand il est arriué qu'ils y ont voulu attenter, lesdits Religieux s'y sont opposez, & ont esté maintenus par plusieurs Arrests du Parlement de Paris en leursdites exemptions & priuileges.

Arrests pour
iustifier la
Superiori-
té.

Premierement par vn Arrest du Parlement de Paris produit sous la cotte B, piece 9. du 16. Iuillet 1599. entre l'Abbé & les Religieux de Sainte Geneuiéue d'une part, & le sieur Euesque d'autre, par lequel est ordonné que le Marguillier qui auoit esté emprisonné de l'autorité dudit sieur Euesque, seroit rendu à l'Abbé & aux Religieux de Sainte Geneuiéue: c'est pour monstrier que non seulement le Religieux Curé de Saint Estienne iouyt des priuileges de ladite Abbaye, mais que le sieur Euesque n'a point de iurisdiction sur les Marguilliers de ladite fabrique.

Secondement, autre Arrest a esté rendu par ledit Parlement le premier Decembre 1424. par lequel, sur ce que l'Euesque de Paris se pretendoit Iuge competant pour connoistre de l'accusation criminelle intentée contre Frere Iean le Feure Curé de Saint Estienne, à cause qu'il s'agissoit du crime d'heresie & de leze Majesté, la cause au principal fut appointée en droit à escrire & produire; & neantmoins par prouision la recreance adiugée ausdits Abbé & Religieux en ces termes: *Per idem Arrestum dicta nostra Curia supradictis conquerentibus* (c'estoit les Religieux demandeurs en complainte) *recredentiam rei controuersa adiudicauit.*

Troisiémement, ladite Superiorité dudit Abbé a esté tellement obseruée en toutes choses, que non seulement les Marguilliers de Saint Estienne n'ont iamais entrepris de rien innouer en ladite Eglise Curiale sans l'autorité desdits Abbé & Religieux, mais non pas mesme d'accepter les fondations qui ont esté faites par leurdite permission expresse, & le mesme des acquisitions, comme il est verifié particulierement par vn contract du 5. Feurier 1550. produit sous la cotte B, piece 22.

En quatriesme lieu, par vn Arrest du dernier iour d'Auil 1527. produit sous la cotte B, par lequel l'Abbé & Religieux de Sainte Geneuiéue qui auoient pris le faict & cause pour leur Curé de Roissy membre de ladite Abbaye, ont esté maintenus en la possession & saisine d'estre exempts de la iurisdiction de l'Euesque & Archidiacre de Paris, sinon à l'égard des Prieurs Curez, *in eo quod concernit curam animarum.* C'est donc tout le seul droit Episcopal que ledit sieur Archeuesque peut donc pretendre esdites Cures. Neantmoins ledit Citolle n'a pas esté seul Religieux Curé qui s'est reuolté contre ses Superieurs, les nommez Freres Estienne Comptesse & Iacques Malaquin l'ont preueni, mais non pas en cet excez d'abolir les droits & prerogatiues desdits Abbé & Religieux en leur Eglise Curiale, & moins encor de pretendre qu'ils fussent exempts de leur Superiorité, parce que le differend aduenu touchant iceluy Comptesse seroit procedé d'une simple irreuerence qu'il auoit portée au Prieur Claustral de ladite Abbaye à l'enterrement d'un des Parroissiens de l'Eglise Saint Estienne, pour laquelle irreuerence il fut excommunié par son Abbé. En suite dequoy s'estant meu procez aux Requestes du Palais, à la poursuite de l'Euesque de Paris qui y auoit fait assigner lesdits Abbé & Religieux, Sentence fut renduë à leur profit; de laquelle ledit Euesque

7

ayant interietté appel, s'en est ensuiuy Arrest l'onzième d'Aoust 1510. produit sous la cotte B, par lequel, quoy que ledit Comptesse demandast absolution à cautelle pendant le differend d'entre ledit Euesque appellant, & lesdits Abbé & Religieux intimé, auroit esté dit que ce dont estoit appel sortiroit son effet, & l'appellant condamné aux dépens de la cause d'appel, & les parties renuoyées ausdites Requestes. Mais depuis ne s'y est rien passé en execution dudit Arrest, sinon que ledit Comptesse s'est tousiours reduit sous l'obeissance desdits Superieurs, & a eu recours à eux quand l'Euesque de Paris l'a voulu assuiettir à sa iurisdiction en autre cas que touchant ladite administration des Sacremens, ainsi qu'il sera dit cy-apres.

Et pour le regard dudit Malaquin le refus qu'il auoit fait de payer à ladite Abbaye vne année de vingt liures de rente & redeuance annuelle, que ses predecesseurs auoient tousiours payé; son Abbé apres les monitions requises de droict, l'excommunia, de laquelle excommunication ayant ledit Malaquin demandé absolution à cautelle pardeuant le Preuost de Paris, en l'instance qui estoit entre les parties touchant ladite redeuance, ledit Preuost l'en auroit debouté par Sentence du 3. de Septembre 1471. sinon qu'il payast à sondit Abbé par prouision ladite redeuance, & porte ladite Sentence, que ladite Abbaye estoit fondée en ladite rente par contract & reconnoissance passée pardeuant Notaire Apostolique & Imperial le 14. de Mars 1471. & produite par les demandeurs sous la cotte B, piece 3.

Et sont lesdites excommunications fondées en disposition Canonique. C. Cum Ecclesiis de maiorit. & obediens. mais pour vn pretexte que ledit Citolle en est exempt, lesdits Marguilliers par leurdit inuentaie pretendent qu'il n'est plus Religieux de ladite Abbaye, & qu'il s'en est affranchy, & neantmoins il en porte l'habit, & ne peut estre Curé de Saint Estienne qu'en qualité de Religieux d'icelle Abbaye; ioint qu'il y a apparence qu'il n'est pas de cet aduis, parce que tousiours il s'est maintenu en l'estat de sa profession Reguliere; & a mesme, nonobstant ladite reforme, continué à faire sa semaine touchant la celebration du diuin seruice en ladite Eglise Abbatiale, iusqu'à ce que depuis quelque temps il en a esté dispensé par le moyen de ce qu'il a acquis la faueur de iubilair; aussi a-t'il tousiours receu sa portion canonique quiluy a esté donnée en qualité de Religieux comme les autres, & ne prend pas, comme ont aussi supposé lesdits Marguilliers, sadite portion canonique pour auoir laissé les dixmes de Grenelle à ladite Abbaye, parce qu'elles en dépendent originairement en consequence de ladite fondation, par le moyen de laquelle ils sont Decimateurs de ladite Parroisse, & en la mesme consideration ils sont obligez de payer les decimes, n'y ayant iamais eu autres que lesdits Religieux qui les ayent payées pour les Curez de Saint Estienne & de Saint Medard. Les quittances qu'ils en ont produit sous le nom de ladite Abbaye le iustificient: & n'en disconuiendront les defendeurs: c'est vne preuue indubitable qu'eux seuls ont interest en ladite Cure, & en sont les Curez primitifs, & n'en a ledit Curé quel'administration de ladite Cure, quando enim Ecclesia unita & fructus uniti sunt Monasterio, tunc cura spectat ad Monasterium, suiuant qu'il est remarqué sur le chapitre Exposuisti. de præbendis, & is qui instituitur:

Supposition
des Marguilliers.

habet tantum Cura exercitium, & loco Vicarij est, ainsi que l'observe Cesar Lambert, in tract. iur. patronat. art. 12. qua. 1. 3. par. lib. primi. Et de plus, estant certain que quand vne Cure en sadite fondation est donnée à vn Monastere, que *tunc cura censetur etiam data*, cap. cum plantare 8. in Ecclesiis. à plus forte raison celle dont il s'agit appartenante à ladite Abbaye, est en suite sous la direction dudit Abbé, ex eo qu'elle ne procede que d'une mesme fondation pour estre précisément deservie par l'un desdits Religieux, institué par ledit Abbé, & estoit anciennement le service Curial d'icelle célébré dans vne Chapelle de ladite Eglise Abbatiale: ce qui a cōtinué iusques au temps du Pape Honoré III. que lesdits Abbé & Religieux obtindrent de luy indult & bulle expresse, qu'ils ont produit sous la cote B, par laquelle luy ayant remonstré que le peuple s'augmentoît tellement en leur Parroisse, qu'il ne pouvoit y entendre le service divin, & supplié sa Sainteté de leur permettre de faire construire vne autre Eglise en la mesme Parroisse, pour la faire deservir par leurs propres Chanoines selon qu'ils auoient ce droit par leurs priuileges, sadite Sainteté leur auroit permis de ce faire: de sorte que de toutes parts elle leur appartient, & en sont les Fondateurs, sans qu'autres qu'eux la puissent deservir, quoy que les defendeurs l'ayent tousiours dénié par leur inuentaïre contre la verité du fait, parce que ledit Curé par ses interrogatoires fol. 15. produit sous la cote F, a reconnu qu'il aueules fonts dans l'Eglise de Sainte Geneuiève comme estant l'Eglise parrochiale.

Supposition
des Mar-
guilliers.

Du depuis lesdits Marguilliers par leur mesme Requête, apres auoir veu la production des demandeurs, ont supposé que ledit service Curial se faisoit precairement en ladite Eglise Abbatiale, iusques à ce que les Parroissiens eussent fait bastir vne Eglise Curiale, mais la preuue n'en est qu'en ladite supposition, non plus que ce qu'ils ont dit, qu'icelle Eglise Curiale n'estoit que pour les domestiques de l'Abbaye; & il paroist au contraire qu'il y auoit affluence de peuple, & que la Parroisse appartenoit ausdits Abbé & Religieux: les termes de ladite bulle sont exprés, *Cum in parochia eorumdem adeo sit populus augmentatus, quod in parochiali Ecclesia nequeant conuenire.* & la transaction deuant dite porte aussi en ces termes, *in parochialibus Ecclesiis Canonicorum de Monte.* Et si ledit service Curial n'y eust esté fait que sous la faculté de precaire, en estant retirée par les Parroissiens & bastie dans la iurisdiction du Diocesain suiuant la mesme supposition, ledit sieur Euesque n'eust eu que faire de transiger pour obtenir ladite iurisdiction Episcopale sur ses naturels Parroissiens, & n'eust pas reconnu, qu'encor qu'il luy ait esté permis de visiter ladite Eglise, & qu'il soit dit que le Curé d'icelle seroit tenu d'assister au Synode, neantmoins il ne peut prendre les droicts qui luy appartiennent en toutes les autres Parroisses qui luy sont suiuettes; parce que c'est vne maxime, que quand vn Euesque *eximit aliquam Ecclesiam retinet procuracionem*, & *Cathedraicum cap. Pastoralis de donat.* & ne pourroient pas les demandeurs s'exempter dudit droit, si ladite Eglise ne leur appartenoit, ny prescrire iceluy. *C. de instantia. de ex. prel.*

C'est pourquoy en consideration que le Curé de Saint Estienne ne peut defendre ses droicts qu'en qualité de simple Religieux de ladite Abbaye, quand il a esté en differend contre l'Euesque de Paris, lesdits Abbé & Reli-

gieux

9

gieux ont tousiours pris le faict & cause pour ledit Curé Religieux; ce qui se voit par vn Arrest rendu par ledit Parlement le 21. Iuillet 1512. produit sous la cotte B, entre l'Abbé & Religieux Sainte Geneuiéue, prenant le faict & cause dudit Comtesse Curé de Saint Estienne d'une part, & ledit Euesque d'autre, par lequel sur l'appel interietté d'une Sentence rendue entre les parties aux Requestes du Palais, que les defendeurs ont produit en leur premiere & seconde production, sans y adiouster ledit Arrest, il est dit, que *præfata Curia per suum iudicium, sententiam & appellationes prædictas absque emenda & expensis causarum appellationum adnullauit, & per idem iudicium eadem Curia prædictas partes respectiue, videlicet dictos Abbatem & Conuentum in possessione & saisina iurium, libertatis, franchisie, & exemptionis à iurisdictione Episcopi Parisiensis & omnium aliorum Episcoporum, & sine medio eidem Sedi Apostolicæ subditos esse; in possessione & saisina eundem Episcopum loca sua infra dictam Abbatiam & Monasterium Sanctæ Genouefæ in circuitu & ambitu eiusdem, præter parochialem Ecclesiam Sancti Stephani infra claustrum & circuitum dicti Monasterij & Abbatie sitam, in concernentibus curam animarum dictæ parochialis Ecclesiæ duntaxat, visitare non posse; dictum verò Episcopum Parisiensem in possessione & saisina iurium Episcopaliū in prædicta Ecclesia parochiali de Monte Sancti Stephani tanquam Episcopum & Diocesanum eiusdem, in his quæ concernunt curam animarum.* De sorte que ledit Arrest iustifie que ledit Comtesse a reconnu que ses priuileges ne pouuoient luy appartenir qu'en ladite qualité de Religieux, puis que lesdits Abbé & Religieux les ont defendus en leur nom; & iustifie aussi que ladite Eglise Saint Estienne est dans la continence dudit Monastere; ce que les defendeurs ont dénié par leur dite Requeste: & finalement iustifie qu'elle iouyt des mesmes exemptions qu'icelle Abbaye, fors ce qui concerne la uisitation des Sacremens & le soin des ames, à quoy les demandeurs ne contredisent point, & ne doit-on aussi au preiudice de leurs titres les priuer des droicts qui leur appartiennent en leur dite Eglise Curiale, n'estant pas iuste que sous pretexte qu'ils presentent audit Euesque de Paris l'un de leurs Religieux pour receuoir de luy la cure des ames, on leur rauisse leursdits droicts. C'est contre la disposition des saints Decrets, *cap. sanè. 16. quæst. 2.* où estant parlé des Religieux qui ont des Cures à eux appartenantes: *Statuimus (inquit Papa) ne in parochialibus Ecclesiis, quas tenent absque Episcoporum consilio Presbyteros collocent, sed Episcopi parochiæ curam cum Abbatibus consensu committant, ut eiusmodi Sacerdotes de populi quidem cura Episcopis rationem reddant, Abbatibus verò pro rebus temporalibus ad Monasterium pertinentibus, debitam subiectionem exhibeant, & sic sua cuique iura seruentur.* Quoy faisant, ledit sieur Archeuesque iouyra comme il a fait sans contredit, de son autorité spirituelle Episcopale, & visitera les Sacremens dont le Curé leur rendra compte, & les Religieux iouyront comme ils ont tousiours fait de leurs droicts de superiorité, direction, & police en leur dite Eglise de Saint Estienne. Et à mesme fin ont produit les demandeurs plusieurs autres bulles; par lesquelles l'Abbaye Sainte Geneuiéue & le Bourg d'icelle sont exempts de la iurisdiction Episcopale, & ont droict de commettre vn Religieux à ladite Cure, de le faire assister de trois ou quatre autres de ses confreres, & le desti-

C

Suppositiōs
des Mar-
guilliers.

tuer quand bon leur sembleroit : ce qui a fort touché les defendeurs ; parce que voyant que les demandeurs auoient fait extraire vne desdites bulles, qui est celle d'Alexandre III. des Registres de la fabrique Sainct Estienne : ils ont encor supposé que la Chapelle du Mont dans laquelle doit estre ledit Religieux commis, s'entendoit de la Chapelle Sainct Symphorien près le College des Cholets, & adioustans à ladite supposition, pretendent que lesdits Religieux ont pollü ladite Chapelle ; & neantmoins l'une & l'autre desdites suppositions sont purement imaginaires, parce qu'il est fait mention par ladite bulle d'une Chapelle Curiale, pour laquelle deservir ledit Religieux doit estre présenté audit Euesque, & prédre de luy l'administration des Sacremens ; ce qui ne se peut entédre d'une Chapelle dans laquelle on ne dit la Messe que le iour du Patron, & n'a autre reuenu que le loyer de quelques chambres de la maison, dans laquelle elle est située, ioint que ledit Abbé y pouruoit de plein droit, & n'y a le Chapelain aucune charge de ladite administration des Sacremens ; & au regad de ladite profanation, l'estat du lieu iustifie que c'est vne pure calomnie.

Suppositiōs
des Mar-
guilliers.

Les defendeurs continuans la deduction de leurdit interest, alleguent au cinquiesme feüillet de leurdit inuentaie, que le seruice diuin a esté celebré, & les Processions de la Feste Dieu & des autres iours solempnels, par les Curez & leur Clergé sous la Banniere & Croix de Sainct Estienne, ausquels les Religieux Saincte Geneuiéue se sont ioints par deuoir quand leurs Abbez ont esté Curez titulaires, & par honneur quand ils n'ont point esté Curez, & qu'ils y ont esté inuitez par le Curé Religieux de leur Maison qui leur a cedé la place par deference, & par les Marguilliers parroissiens de Sainct Estienne, & si quelquefois ils y ont porté leur Ciboire, que ç'a esté pour en accommoder ladite Eglise ; & en suite que les Marguilliers & Officiers de cette Eglise n'ont point esté faits par l'ordre desdits Religieux, ny leurs comptes rendus pardeuant eux, & s'il a esté pris quelque chose du fonds de ladite Eglise Saincte Geneuiéue, que les Religieux en ont esté recompensez au quadruple ; & neantmoins que par droit de voisinage les nouveaux Religieux de Saincte Geneuiéue se veulent rendre maistres de ladite Cure comme de la pluspart des Monasteres de Sainct Augustin : mais tout ce discours non plus que le reste dudit inuentaie, ne contient que de fausses suppositions.

Car il est vray que iamais le Curé de Sainct Estienne n'a tenu autre rang en ladite Procession solempnelle du Sainct Sacrement, ny aux autres actes publics où se sont trouuez lesdits Abbé & Religieux, que celuy de sa profession de Religieux, & iamais aussi les demandeurs ne se sont allez ioindre à la Procession de S. Estienne, mais bien les Curez de ladite Parroisse, leur Clergé & Parroissiens à celle de Saincte Geneuiéue, qui a esté establie en l'Eglise Abbaticale dès auparauant l'année 1381. ainsi qu'il est iustifié par vn ancien cartulaire de ladite Abbaye, duquel a esté extraite par compulsoire l'observation suiuant : *Ce iour nous faisons Procession solempnelle autour de nostre terre en portant le Sainct Sacrement comme on a accoustumé* : Mais dautant que cette relation de ladite Procession solempnelle de l'Eglise Abbaticale faisoit voir

son antiquité, les defendeurs ont aussi supposé par le procez verbal dudit compulsoire, & mesme par leurdit inuentaie, qu'elle se faisoit seulement autour du Cloistre de ladite Abbaye: parce, disent-ils, que les Religieux ne doiuent auoir autre terre que leurdit Cloistre: c'est vne inuention dont autres qu'iceux Marguilliers ne se fussent pas auisez, & neantmoins ils n'ont pas pris garde que quantité de Respons sont chantez en ladite Procession, l'un desquels suffiroit pour le temps qu'il faudroit, si elle se faisoit dans le peu d'estenduë que contient le Cloistre de ladite Abbaye; & sont tous lesdits Respons rapportez en suite de ladite obseruation: en voicy le dénombrement, *Veni Creator, Homo quidam, Gaude & latare, la Prose Inuiolata, celle des Anges, de Saint Iean Baptiste, de Saint Pierre, Cornelius, & de Sainte Geneuiéue, & apres le Sermon en François.* Ce qui est à obseruer, parce que ledit Sermon qui se fait au peuple iustifie la totale direction que lesdits Religieux ont en ladite Procession, en laquelle ledit Curé doit estre soumis à ses Superieurs, en la presence desquels il n'a point d'exercice de iurisdiction, sinon pour l'administration des Sacremens, suiuant le chapitre *volentes, de iudic. deleg.*

Or si les defendeurs ont si mal rencontré en l'interpretation caillatoire qu'ils ont donnée contre la teneur dudit cartulaire, ils ont fait le mesme alleguant les sousmissions de l'Abbé & Religieux de Sainte Geneuiéue ausdits Curé & Parroissiens de Saint Estienne: car quoy qu'ils pretendent qu'eux & ledit Curé ont tousiours eu la conduite de ladite Procession solennelle, & la direction & prerogatiues du seruice diuin aux festes de Saint Estienne, sinon quand les Abbez Sainte Geneuiéue ont esté priez d'y assister, ou qu'ils estoient Curez de Saint Estienne; il est neantmoins certain que leursdites prieres n'ont esté qu'un compliment que lesdits Curez & Marguilliers estoient tenus rendre ausdits Abbez, pour y prendre des prerogatiues que les demandeurs y ont; mais parce que l'usage desdites prerogatiues ne peut estre contraint, parce qu'il depend de leur pure faculté, par bienseance sont tenus de les prier, & de toute ancienneté lesdits Curé & Marguilliers auoient accoustumé de ce faire, ainsi qu'il est iustifié par le procez verbal du compulsoire qui a esté fait des registres de ladite fabrique Saint Estienne; autrement n'auroient pas eu lesdits Abbez l'autorité de celebrer le seruice en habits Pontificaux en ladite Eglise, ce qu'ils ont neantmoins tousiours fait. Et en suite d'icelle superiorité fondée en titres cy-dessus, contre lesquels quand les demandeurs n'en auroient iamais iouy, les defendeurs ne pourroient pas en auoir acquis la franchise, parce qu'ils ne sont pas de la qualité de la pouuoir acquerir; ioint que les demandeurs en sont en possession immemorale, conformément aux titres de leurdit superiorité & droit de patronage.

Ce qui se iustifie par vne ancienne copie de lettres produites sous la cote D, piece 12. énonciatiues, que le 10. de Novembre 1461. Pierre Abbé de Sainte Geneuiéue fut supplié par les Marguilliers de ladite Eglise Curiale, de leur permettre l'augmentation de ladite Eglise, & leur donner partie du fonds de leur infirmerie pour cet effet: ce que ledit Abbé leur accorda en

fuitte des droicts qu'il auoit en ladite Eglise, qui sont ceux dont s'agit: voicy la teneur de ladite piece: *Animaduertentes quòd prædicta Capellæ collatio, promissio, & quæuis alia dispositio, matriculariorum eiusdem institutio, computorumque eorum cognitio, ad nos Abbatem prænominatum pertinere dignoscuntur pleno iure, Parochianorum & matriculariorum requesta & petitionem iustam & honestam fore iudicantes, matura deliberatione præhabita eisdem concessimus & donauimus, & per nostras præsentis concedimus & donamus quantitatem duodecim pedum cum medietate latitudinis de terra infirmaria nostra. Et où il est parlé de ladite Eglise par les mesmes lettres, sont ces termes, Cum itaque Parochiani Capellæ nostræ de Monte: ce qui a esté cause que les defendeurs quand on leur a fait commandement en vertu des Arrests du Conseil, de représenter le registre dans lequel elles sont enregistrées, ont dénié l'auoir en leur possession, comme aussi n'ont-ils iamais voulu représenter ceux des années precedentes, ny le siecle de l'an 1500. ny ledit Curé son registre des mortuaires, par lequel eust esté iustifié que les Abbé & Religieux Sainte Geneuiéue ont assisté & presidé de temps en temps aux sepultures d'infinies personnes inhumées dans ladite Eglise Parrochiale, & officié tant aux sepultures, qu'aux actes publics, où se sont trouuez les Abbé & Religieux avec ledit Curé.*

La Sentence contre ledit Frere Jacques Malaquin est aussi iustificatiue de ladite possession, parce que ledit Abbé pour iustifier que ladite redeuance luy estoit deuë, & que son titre estoit legitime, il en tiroit consequence, *De ce que les Cures dépendantes de ladite Abbaye luy estoient suiuettes sans moyen, sous l'autorité du Saint Siege Apostolique dont le gouvernement luy appartenoit à cause de sa dignité Abbatiale, que ladite Cure Saint Estienne estoit fondée sous le toict & appartenances d'icelle Eglise Abbatiale, en laquelle on entre de l'une en l'autre par mesme huisserie, auoit esté de tout temps deserue par les Abbez & Religieux chacun en son temps, & estoit anciennement ladite Eglise Saint Estienne vne des Chapelles d'icelle Abbaye.*

Que par priuilege special du Pape Clement auoit esté octroyé que ladite Eglise seroit deserue par quatre, ou trois du moins desdits Religieux qui seroient instituez par ledit Abbé pour y faire le seruice diuin, dont l'un seroit présenté à l'Euesque Diocesain par iceluy Abbé, lequel en effet comme vray Patron & Curé de l'Eglise Saint Estienne y auoit la vraye visuation.

Que les Marguilliers de ladite Eglise Saint Estienne estoient faits, creéz & mis par ledit Abbé, & à luy suiets de rendre les comptes de la marguillerie & fabrique, & n'a point ledit Malaquin contesté contre lesdites prerogatiues, mais seulement contre la demande faite d'icelle redeuance, pour n'auoir pas connoissance que le contract y mentionné eust esté passé avec ses predecesseurs Curez: mais par succession de temps les Marguilliers de ladite fabrique se sont en fin exemptez du payement de ladite rente, comme ils pretendent encor faire touchant vne liure de cire vermeille qu'ils doiuent à ladite Abbaye, en reconnoissance de sa superiorité sur ladite Cure, ainsi qu'il est remarqué ésregistres de ladite fabrique, & est iustifié par le procez verbal du compulsoire qui en a esté fait, produit par les demandeurs sous la cote F, & sous la mesme cote sont trois actes, l'un du 1. Iuillet 1537. contenant que l'Abbé de Sainte

Geneviève, Curé de Saint Estienne, & le Sousprieur Vicaire ont assisté à l'election des Marguilliers, & y ont les premiers donné leurs suffrages; & en suite du mesme acte, est la prestation de serment que ceux qui ont esté esleus Marguilliers ont fait entre les mains dudit Abbé, de bien & deuëment exercer ladite charge. Et contiennent aussi le second & troisieme desdits actes la mesme chose, Et particulièrement, que M^{re} Nicolas Fauchet prestitt iuramentum fidelitatis dicti officij matriculatus, ut mos est. Et ont aussi produit les demandeurs sous la cote C, piece 17. vn acte de notoriété passé pardeuant Notaires du Chastelet de Paris le dix-septiesme Ianuier 1501. par lequel plusieurs des Parroissiens, pers' obseruoit alors, Laïques que Ecclesiastiques ont affermé selon la forme qui sonnes tant qu'ils scauoient de verité, que la Cure de Saint Estienne estoit de l'Eglise Abbatiale de Sainte Geneviève, qu'elle estoit deservie & les Parroissiens d'icelle assiste de tous les Sacremens par les Religieux de ladite Abbaye ou leur Com-
mis.

Electi-
on des Mar-
guilliers.

Que ledit Abbé comme principal Curé & Administrateur de ladite Parroisse auoit toute la direction dans ladite Cure, que quand il estoit besoin de reparer ou faire quelques edifices, les Marguilliers le faisoient par le congé & licence dudit Abbé.

Prerogati-
ues de l'Ab-
bé de Saint
de Gene-
viève sur
l'Eglise de
S. Estienne.

Quiceluy Abbé nommoit les Marguilliers, qui luy faisoient serment d'exercer ladite marguillerie, & luy rendoient compte chacun an, quand bon luy sembloit, de toutes les mises & receptes, & estoient lesdits Abbé & Religieux principaux Curez de ladite Parroisse; & pour monstrier que ledit Abbé estoit le vray Curé, que chacun an au iour de Saint Estienne il enuoyoit son Prieur avec plusieurs Religieux, pour faire le seruice en ladite Cure, & luy mesme chantoit la grande Messe, & son Prieur le reste du seruice.

Que ledit Abbé fait la Procession le iour du Saint Sacrement, où toute la Parroisse s'assemble au lieu Sainte Geneviève, & ledit Abbé & son Prieur vont les derniers à la Procession, & celuy qui est commis à ladite Cure ne va qu'à son rang de Religieux selon son antiquité, & qu'en vne Procession faite en ladite Parroisse où on auoit porté le Corpus Domini à cause d'un heretique, le Prieur fit la Procession en l'absence dudit Abbé, & alloit le Curé en son rang de Religieux. Ce sont des remarques particulieres dont on ne peut douter, parce que tout ce qui est contenu par ledit acte dépend d'icelle Superiorité, & les defendeurs mesmes ont reconnu par leur dit inuentaie, que l'Abbaye Sainte Geneviève & la Cure Saint Estienne sont la mere & la fille; & neantmoins ledit Curé & Marguilliers par la conduite dudit sieur Badran pretendent que la fille suffoque sa mere, & en ce faisant veulent abolir ce que leurs predecesseurs ont tenu à honneur de conseruer, & en ont fait estat dans les registres de ladite fabrique, ainsi qu'il se voit par ledit procez verbal de compulsoire produit sous ladite cote F, par lequel a esté extraict du registre 1573. que le iour de la Feste-Dieu à la Procession du Saint Sacrement, à Sainte Geneviève, assistent monsieur de Sainte Geneviève, les Religieux & Parroissiens chacun en son ordre. Tellement que c'est la Procession de ladite Abbaye, & non pas de ladite Cure; & au mesme procez verbal, est l'extraict d'un autre registre par lequel a esté obserué, que le iour de la Feste-Dieu la Procession se fait enuiron les huit heures du matin,

Suppositiōs
des Mar-
guilliers.

Et doit-on passer par Sainte Geneviève où l'on va prendre le Saint Sacrement & joindre la Procession de Sainte Geneviève, à laquelle monsieur l'Abbé assiste & officie revestu de ses habits Pontificaux. Ce sont trois faicts qui ont esté déniez par les defendeurs contre leur conscience, parce qu'ils ont dit que les Religieux alloient se joindre à leur Procession, & que le Saint Sacrement de Saint Estienne y estoit porté; ce qui ne fut iamais que depuis l'année 1639. qu'ils ont entrepris de renverser l'ordre qui a de tout temps esté observé en ladite Procession solennelle; & mesme en l'année 1638. que ledit Badran commença de la vouloir supprimer, comme se iustifie par ledit inuentaie, par lequel les defendeurs apres estre demeurez d'accord qu'il n'y feroit rien innoué, se sont offensez que l'Abbé Coadjuteur y presidast en ses habits Pontificaux: ce qui a donné suiet ausdits defendeurs d'inuectiver comme ils ont fait par le mesme inuentaie contre la dignité dudit Abbé Coadjuteur, mais sont des excez de passion qui les ont fait parler.

Ordre de
la Procession
du S.
Sacrement.

Au feuillet 10. du mesme compulsoire est vn autre extraict qui contient tout l'ordre de ladite Procession, à sçavoir, que le Reliquaire du Saint Sacrement est pris dans l'Eglise Sainte Geneviève, & porté par deux Prestres de S. Estienne, que l'Abbé & Religieux tiennent le premier rang, ledit Abbé en ses habits Pontificaux, & qu'au retour le Saint Sacrement est rapporté en l'Eglise de ladite Abbaye.

Suppositiōs
des Mar-
guilliers.

Et dautant que les demandeurs ont iustifié par les extraicts qu'ils ont fait compulser de leurs registres depuis l'an 1593. iusques en l'an 1637. produits sous ladite cote F, qu'ils ont tousiours salariez lesdits Chapelains pour leurs peines d'avoir aidé à porter le Saint Sacrement & Croix de ladite Eglise Sainte Geneviève: les defendeurs se sont auisez de quatre suppositions. La premiere par le moyen d'une addition qui a esté faite depuis ledit procez, tant en la marge qu'en l'interligne de leursdits registres, suiuant laquelle ils ont voulu dire que ledit ordre de ladite Procession auoit esté changé du consentement desdits Religieux; & parce que les parties procedans audit compulsoire, les demandeurs ont fait reconnoistre ladite addition d'écriture recente; les defendeurs pour couvrir la verité de ce qui s'en estoit passé, se sont fait donner vn acte par le pretendu seruiteur du sieur de Predeleigne, de ce qu'il auoüoit auoir fait ladite écriture, comme si ledit seruiteur estoit de telle creance que sa relation fust suffisante pour faire croire ce qui n'a iamais esté de la part desdits Religieux; c'est vne illusion trop apparente.

La deuxiesme est de mesme substance, & la dénonciation de Maistres Mordant & Radigon, l'un Vicaire de Saint Estienne & l'autre Sous-Sacristain de Sainte Geneviève, qui a esté démis de sa charge depuis quelques années pour iuste suiet, ont fait aux defendeurs des declarations qu'ils auoient faites pardeuant Notaires, à celle fin qu'iceux defendeurs les fissent compulser, lesquelles monstrent assez l'artifice malicieux duquel ils auoient vsé pour mandier la lettre & les articles, desquels les defendeurs mal à propos & en vain, pretendent se preualoir; puis que le contraire est assez iustifié par ce qui a esté dit cy-deuât, & par les propres Parroissiens & Ecclesiastiques de S. Estienne qui ont esté ouys sur les faicts pertinens des demandeurs, comme aussi par

15

le fleur Chancelier de l'Vniuersité, le Prieur de Sainct Medard, & autres
duys sur les mesmes faicts.

La troisieme concernant ledit salaire desdits Chapelains, les defendeurs
par leurs dernieres pieces produites, pretendent iustifier par le moyen d'ex-
traicts qu'ils pretendent auoir tiré des comptes de la Confrairie du Sainct Sa-
crament, sans y auoir fait appeller les demandeurs, que les Prestres qui por-
toient le Sainct Sacrement à la Procession de la Feste Dieu, & ceux qui por-
toient autrefois le dais auant qu'on y admist des personnes laïques, receuoient
leurs retributions aux depens de ladite Confrairie; mais c'est vne pure illusion,
parce que iamais cela ne fut: & si cette obseruation s'y trouue auoir esté faite
par lesdits comptes, s'ils sont representez fera veu que c'est quelque nouuelle
supposition, ou que par iceux il est seulement fait mention de ladite Con-
frairie du Sainct Sacrement en l'Eglise Sainct Estienne, & non pas de ladite
Procession solennelle: & encor est-il vray, que l'establissement d'icelle Confrai-
rie a esté fait sous l'autorité de l'Abbé Saincte Geneuiéue, comme quand il a esté Seruiue di-
uin changé
à Sainct
Estienne
par la per-
mission de
l'Abbé.
question d'y changer le seruiue qui se celebrait à l'usage de ladite Abbaye, ça esté aussi
du consentement & permission dudit Abbé, & n'a iamais esté basti ny augmenté en
ladite Eglise sans la mesme permission, & l'ont lesdits demandeurs iustifié par
quantité de pieces produites audit procez.

Et au regard de la quatriesme desdites suppositions, elle concerne ce que
les defendeurs ont dit par leursdites requestes, que le Curé & son Cler-
gé tenoient le premier rang dans ladite Procession; ce qui est de tout point Supposi-
tions.
contraire ausdites obseruations prises dans leurs propres titres, & aux recon-
noissances contenuës par lesdits interrogatoires.

Après tant de déguisemēt ont aussi lesdits Marguilliers supposé, au rapport
& induction qu'ils font par leur dite requeste, des Arrests du Parlemēt par eux
produits en leur seconde production; premierement touchant celui du 8. Fe-
urier 1633. contre le Chapitre de l'Eglise de Senlis au profit du Curé de la Par-
roisse Nostre Dame, duquel sous pretexte que les offrandes du Roy luy ont
esté adiugées, nonobstant que ladite Cure soit deseruiue dans ladite Eglise de
Senlis, ils en induisent, que si les Parroissiens de Sainct Estienne en la pre-
miere naissance de leur Eglise se sont retirez dans l'Eglise Saincte Geneuiéue
pour y receuoir les Sacremens, en attendant la construction de leur Egli-
se, cela ne peut donner auantage ausdits Religieux, veu que quand la
Parroisse seroit encor au mesme estat, les Religieux n'y auroient aucune au-
thorité: mais ladite induction est mal prise, parce que l'Eglise de Senlis ap-
partient à l'Euesque du lieu, & non pas ausdits Chanoines, au contraire de
l'Eglise de Saincte Geneuiéue, qui appartient ausdits Abbé & Religieux, pri-
uatiuement en toutes choses à monsieur l'Euesque de Paris, parce qu'elle ne
reconnoist autre Diocesain que sa Saincteté, & est le Curé de Sainct Estien-
ne l'un du corps des Religieux de ladite Abbaye, & ne tient l'Eglise Curiale
qu'en ladite qualité de Religieux; & par consequent il y a grande difference
entre les droicts du Chapitre de ladite Eglise sur un Curé qui dépend de son
Diocesain, & n'est point Chanoine dudit Chapitre, & celui de ladite Ab-
baye sur ledit Curé Religieux, membre dépendant de leur Communauté.

Les droicts
de l'Eglise
Cathédrale
de Senlis
sur le Curé
de Nostre-
Dame.

Neantmoins, puis que les defendeurs prennent les droicts dudit Curé de Nostre-Dame pour le reglement de leurs droicts, en la contestation qui est entre les parties, les demandeurs iustificient par vn acte capitulaire, tiré des registres de ladite Eglise de Senlis le 20. Feurier 1642. signé la Fosse, Secretaire dudit Chapitre de Senlis, avec vne attestation du sieur Billoré Curé de ladite Eglise de Nostre Dame, par lesquelles le Doyen, Chanoines, & Chapitre de ladite Eglise ont en ladite Parroisse toutes les prerogatiues dont s'agit, & ne marche ledit Curé es actiōs solennelles avec le corps dudit Chapitre qu'avec les Chapelains d'iceluy, sans marque de Curé, ne porte point d'estole en la Procession de la Parroisse iointe avec celle de l'Eglise Cathédrale, la Croix de ladite Parroisse, ny le Sainct Sacrement d'icelle ne sont point portez en la Procession solennelle du iour de la Feste Dieu, le Curé ne donne point la benediction au Predicateur, & ne fait aucun acte de Curé aux enterremens des Parroissiens de ladite Eglise, & aux autres actions solennelles où se trouuent lesdits Doyen & Chanoines, comme il s'obserue en toutes les Eglises Cathedrales & Canoniales, suiuant plusieurs Arrests de Parlemēt que les demandeurs ont aussi produit, avec quantité d'actes de Communauté qui font foy de la mesme chose: il n'y a que la reuolte faite par les defendeurs, qui ait fait suspendre le droict des demandeurs en ladite Eglise Curiale.

Priueleges
de Sainte
Geneuēue
confirmés
par Arrest
contre
Monsieur
l'Euesque
de Paris.

Ont aussi produit les defendeurs en la mesme production, vn Arrest rendu audit Parlement de Paris le 21. de Iuillet 1512. qui est la dix-huictiesme piece produite par les defendeurs sous la cotte B, duquel ils supposent aussi que le sieur Euesque de Paris a esté maintenu en la possession du droict & autorité de visiter la Cure de Sainct Estienne, & de tous autres droicts Episcopaux comme Euesque, Pasteur, & Superieur de ladite Eglise en ce qui concerne la cure des ames, comme sont les processions, les sepultures, l'Office diuin, l'administration des Sacremens, & autres droicts specifiez audit Arrest; & neantmoins il n'y est nullemēt parlé des processions, sepultures, ny du seruice diuin: tant s'en faut, parce que par ledit Arrest par lequel la Sentence des Requestes que les defendeurs ont produite, a esté infirmée, lesdits Abbé & Religieux ayans, comme il a esté deuant dit, pris le faict & cause pour leur Curé Frere Estienne Compresse, ont esté maintenus en leurs priueleges, exemptions, & immunités, fors pour ce qui regarde le droict de visite, & ce qui concerne l'administration des Sacremens en ladite Eglise de Sainct Estienne: & contient iceluy Arrest tout ce que ledit sieur Archeuesque de Paris peut pretendre en ladite Cure, par exception desdits immunités & exemptions adiugées ausdits Abbé & Religieux.

Les defendeurs pretendent aussi, qu'à l'exclusion desdits Abbé & Religieux, doit estre procedé à l'eslection des Marguilliers de ladite fabrique & qu'ils ne sont tenus rendre compte de leur administration qu'ausdits Parroissiens, & en sont en possession; mais iamais ne fut iugé avec les demandeurs ou leurs predecesseurs ausquels appartient ladite Eglise, qu'ils ne pouuoient assister à ladite eslection, y ayant particulier interest, puis qu'il est iustificié au procez, que les Abbez ont presidé à l'eslection des Marguilliers tant en ladite Eglise de Sainct Estienne qu'en la Parroisse de Sainct Medard, & que les Marguilliers ont presté serment entre les mains de l'Abbé, de bien & deuē-

ment

ment exercer leurs charges, ny que lesdits comptes seroient rendus pardeuant autres que pardeuant eux: la seule qualité de Patrons Ecclesiastiques les y fonde, c'est la difference qu'il y a touchant les droicts de Patronnage entre les Ecclesiastiques & Laïques, ainsi qu'il est remarqué par Rebuffe *in tract. congrua portionis, numero 41.* & en cette consideration, & de ladite superiorité, les demandeurs & leurs predecesseurs sont en ladite possession dudit droict, laquelle n'a cessé que depuis que Monsieur le Cardinal de la Rochefoucault a esté pourueu de ladite Abbaye, n'ayant pû entendre ausdits comptes, par le moyen de ce qu'il estoit obligé à demeurer près la Personne de sa Maïesté: ce qui ne peut preiudicier aux droicts de ladite Abbaye, parce qu'il suffit qu'ils sont fondez dans ledit droict, lequel se renouelle autant de fois qu'il conuient faire ladite election. Et quant à leur dite possession, qui est la confirmation de leursdits droicts, les mesmes registres de ladite fabrique la iustifient; car par le procez verbal dudit cōpulsoire produit sous la mesme cote F, par lequel *fol. 13. verso*, sont deux extraicts de comptes rendus pardeuant l'Abbé Sainte Geneuiéue, & l'autre pardeuant Maistre Bernard Bourguignon son Commis: & au feüillet 17. *il est dit que le compte y énoncé, a esté ouy & examiné par l'Abbé Sainte Geneuiéue & Frere Iean Berson; au feüillet 21. sont autres extraits d'un cōpte examiné par ledit Berson Religieux commis dudit Abbé: & en suite sont produits autre quantité d'extraicts à mesme fin, contre lesquels les defendeurs n'ont pû dire autre chose, que quand lesdits comptes estoient rendus aux Abbez le Bel & Foulon, ils estoient lors Curez de S. Estienne: mais ne se trouuera point que iamais ils ayent esté rendus aux Curez de ladite Parroisse en ladite qualité, mais bien quand ils ont esté Abbez & Curez en qualité d'Abbez; & si les defendeurs eussent voulu représenter les comptes des siecles precedens, eust esté veu que ladite possession est aussi ancienne qu'il y a eu des Marguilliers à Saint Estienne; les titres cy-deuant déduits le iustifient: la preuue vocale qu'ont les demandeurs de leursdits droicts, est vne autre conuiction de leur dite supposition.*

Comptes
rendus de-
uant l'Abbé
de Sainte
Geneuiéue
ou son Cō-
mis.

Comptes
des fabri-
ques ne se
rendent ia-
mais au Cu-
ré en quali-
té de Curé.

Par le procez verbal qui fut fait par le Baillif Sainte Geneuiéue, ancien Ad-uocat du Parlemēt, le iour de la Feste-Dieu 1639. est iustifié que les defendeurs entrerent tumultueusement dans l'Eglise Abbatiale pour y commander, avec des baguettes qu'ils tenoient à la main. Ledit Chancelier de l'Vniuersité de Paris ancien Religieux de ladite Abbaye, apres auoir esté ouy par serment, y a rapporté tout l'ordre qui auoit depuis sa connoissance esté gardé en ladite Procession solennelle. Les defendeurs mesme par leur dit inuentaïre demeurent d'accord qu'il fut aduisé en l'an 1638. qu'il ne seroit rien innoué à ladite Procession, mais que l'Abbé Coadiuteur y voulant faire l'Euesque, y alla en habits Pontificaux, & y fut la Croix Sainte Geneuiéue portée. Et dautant que cette reconnoissance est l'approbation de ladite possession, ils pretendent la déguiser, disant que ladite Croix fut portée par surprise; & neantmoins il est constant par le procez qu'elle y a tousiours esté portée.

Ledit Curé de Saint Medard aussi ancien Religieux, par ses interroga-toires, qui sont produits par les parties, sur la fin de ceux qui ont esté faits ausdits demandeurs, rapporte de point en point les prerogatiues desdits

Comptes
rendus par
les Mar-
guilliers de
S. Medard
& de Saint
Estienne à
l'Abbé de
Sainte Ge-
neviève.

Religieux en ladite Eglise Curiale, lesquelles sont aussi gardées en son Eglise se dépendante de ladite Abbaye, & de tout temps immemorial les comptes d'icelle Eglise ont esté rendus audit Abbé ou son Commis, ainsi qu'il se void par le procez verbal du compulsoire qui en a esté fait, que lesdits demandeurs ont produit à cette fin.

Entre les Parroissiens de Saint Estienne, qui ont esté interrogez sur les faiçts des demandeurs en vertu de l'Arrest du Conseil, François Rustan aagé de soixante ans, a reconnu avoir tousiours veu l'Abbé Sainte Geneviève en la Procession solennelle du Saint Sacrement le iour de la Feste-Dieu: & au feüillet 10 desdits interrogatoires, qu'il y a aussi veu aller le Curé, non en qualité de Curé, mais en son rang de Religieux sans estole, les Prestres habituez entre la Croix & les Religieux.

Reconnoi-
sance faite
par le Sacri-
stain, par les
habituez, &
autres Par-
roissiens de
l'Eglise de
S. Estienne.

Au feüillet 17. verso, que de tout temps le Prieur, Sousprieur, grand Vicaire, & les autres Religieux ont fait les fonctions de Curez quand le Corps desdits Religieux marche, qu'en cette qualité le sieur Prieur Dubut ancien Religieux & Chancelier de ladite Abbaye, a leué le corps du sieur Baillif de Sainte Geneviève & de sa femme, & les corps de deux Polonnois.

Au feüillet 15. recto, Louis Bourcier âgé de 55. ans, reconnoist avoir veu le Curé aller à la Procession du Saint Sacrement en qualité de Religieux sans estole, où les Abbez & Religieux appelez aux conuois, transports, & enterremens, l'Abbé prenoit l'estole, en son absence le Prieur ou Sousprieur.

Au feüillet 28. qu'il a veu officier le sieur de Brichanteau & Monsieur le Cardinal de la Rochefoucault Abbez de Sainte Geneviève, en ladite Eglise de S. Estienne.

Au feüillet 31. M. Pierre Clement âgé de Chappier de ladite Eglise Saint Estienne, reconnoist avoir veu ledit Curé à la Procession du Saint Sacrement avec une chappe en son rang de Religieux.

Au feüillet 33. recto, qu'il a veu officier à Saint Estienne les sieurs Abbez de la Rochefoucault & de Brichanteau.

Au mesme feüillet, qu'il a tousiours veu porter la Croix de Sainte Geneviève le iour du Saint Sacrement à la Procession les iours de Feste-Dieu.

Fol. 37. M. Iean Charles Notaire, âgé de quatre-vingts ans, a veu le Curé à la Procession en son rang de Religieux.

Fol. 43. verso, M. Nicolas Ruelle Prestre Sacristain de l'Eglise Saint Estienne, âgé de septante ans, a veu que le Saint Sacrement consacré à l'Eglise Sainte Geneviève a esté porté à la Procession le iour de la Feste-Dieu, & que le Curé & Parroissiens ont tousiours accoustumé d'aller prendre les Abbez & Religieux à la Procession.

Fol. 44. qu'il a aussi veu aller ledit Curé à la Procession en son rang de Religieux & sans estole, & porter la Croix de Sainte Geneviève à la Procession du Saint Sacrement par le Clerc de Saint Estienne; & que quand lesdits Abbez & Religieux ont leué les corps des habitans de ladite Paroisse, le Curé n'y estoit qu'en son rang de Religieux.

Au mesme feüillet verso, qu'il a veu dans les registres de ladite fabrique, que les Marguilliers s'eslisoient avec l'Abbé ou Superieur, & prestoient le serment en leurs mains.

Et combien que ledit Curé soit la principale partie qui conteste contre les droits de ladite Abbaye, il n'a pû si bien déguiser ses interrogatoires, qu'il n'ait reconnu au feüillet 30. & 31. *qu'estant Prieur Clausstral il a plusieurs fois conduit la Proceßion dudit Sainct Sacrement en la presence du Curé Sainct Estienne son predecesseur, & que sondit predecesseur ne tenoit que son rang de Religieux, & qu'en ladite qualité il a leué les corps des habitans: & sont lesdites reconnoissances confirmées par ledit Curé de Sainct Medard.*

Reconnoissance faite par le Curé

Le seruice que les demandeurs ont droit de celebrer en l'Eglise de Sainct Estienne, est aussi iustifié par les titres qui ont esté compulsez du tresor de la fabrique Sainct Estienne, par le procez verbal duquel compulsoire produit sous ladite cotte F, au feüillet 4. recto, est l'extraict d'un registre del'an 1572. *contenant que les Religieux de Sainte Geneuiéue tiennent le Chœur, & chantent les Vespres & Matines, & que pendant lesdites Matines, & apres le Te Deum les Religieux viennent dedans le tresor prendre la collation.*

Seruice solemnel fait par l'Abbé de Sainte Geneuiéue en habits Pontificaux en l'Eglise Sainct Estienne.

Au mesme feüillet recto, que le iour de l'Inuention de Sainct Estienne, Monsieur l'Abbé de Sainte Geneuiéue dit la Messe, & auparauant assiste en Pontificat à la proceßion.

Ce qu'estant précisément iustifié par les mesmes titres des defendeurs, on ne peut pas dire à quelle fin ils ont dit que les Abbez y estoient allez par deuoir quand ils estoient Curez, & par honneur quand ils en estoient priez, parce qu'il paroist par les termes dudit registre, que tant l'Abbé que lesdits Religieux ont le droit de ce faire; car autrement ne seroit pas fait mention qu'ils tiennent le Chœur, & chantent les Vespres & Matines, ny du surplus qui est rapporté en leur registre contenant le seruice qui se fait par ledit Abbé en ses habits Pontificaux: c'est ce que les Euesques de Paris n'eussent iamais permis s'ils n'eussent reconnu l'exemption de ladite Eglise.

Les defendeurs pour toutes exceptions n'ont allegué que lesdites suppositions, corruptions du sens litteral des titres, & infinies calomnies; le tout pour se donner des droits qu'ils supposent Episcopaux, afin de les confondre à leur charge de Marguilliers, & de reduire ledit Curé & ladite Cure Sainct Estienne en secularité.

Et dautant que les demandeurs ont mis en fait, qu'en l'Eglise Abbatiale estoient restées les marques de l'Eglise Curiale, à sçauoir l'Autel Parrochial, les fonts baptismaux, qui en sont aussi vne marque particuliere & infaillible, *Cum iure communi baptisteria solis concessa sint Parrochis. C. his qui de maiorit. & obediens.* les defendeurs ont dénié la verité de l'un & de l'autre, quoy que par ladite transaction del'an 1202. il soit dit, pour monstrier la difference de l'Autel qui estoit en la Chapelle Curiale & celui de ladite Abbaye, que quand il y aura interdit en la Parroisse, le Prestre *in altari parochiali, quod est intra maiorem Ecclesiam nihilominus celebrabit:* & au regard desdits fonts baptismaux, que par un acte passé pardeuant Notaire le 26. de Nouembre 1533. produit par les demandeurs sous la cotte C, piece 9. l'Abbé Sainte Geneuiéue ait permis aux desnommez de fonder deux Messes *in capella coram fontes;* mais ledit seigneur Cardinal de la Rochefoucault les a fait oster pour la decoration de ladite Chapelle, & a mesme ledit Curé de Sainct Estienne par ses interrogatoi-

Preuves de l'Autel Parrochial, & des fonts baptismaux en l'Eglise Abbatiale de Sainte Geneuiéue

res reconnu auoir veu lesdits fonts en ladite Eglise Abbaticale.

Benedictio
du Ceme-
tiere de S.
Estienne
par l'Abbé
de Sainte
Geneuiève.

Reconnoi-
sance de la
supériorité
de ladite
Abbaye.

Les mesmes droicts de ladite Abbaye sont encor iustifiez par les mesmes registres de ladite fabrique, suiuant le procez verbal du compulsoire, desquels registres fol. 9. a esté extraict des comptes de l'an 1613. contenant, qu'en ladite année Monsieur de Brichanteau Abbé de Sainte Geneuiève, à la priere des Marguilliers, a beny en ses habits Pontificaux le Cemetiere de Saint Estienne: & au feüillet 25. recto d'un registre de l'an 1564. est fait mention des resolutions prises par les Marguilliers de Saint Estienne en presence du Chancelier de Sainte Geneuiève, & sur celles dont le dit Chancelier disoit n'auoir charge, a esté resolu d'attendre la responce dudit sieur Abbé.

L'Office di-
uin se fai-
soit à Saint
Estienne à
l'usage de
Sainte Ge-
neuiève, &
changé du
consente-
ment dudit
Abbé.

Au feüillet 25. recto, portant que les declarations concernant l'Oeuure, ont esté passées en la presence dudit sieur Abbé & Chancelier. Au mesme feüillet recto & verso, est dit, qu'il a esté delibéré par les Marguilliers & Parroissiens sur le changement du seruice diuin de l'Eglise Saint Estienne, & qu'il auoit esté iusques alors chanté & célébré selon l'ordre & usage de Sainte Geneuiève; & sont toutes ces remarques faites par les predecesseurs des defendeurs, avec autant de zele de conseruer les droicts de ladite Abbaye, que les defendeurs sont portez à la suppression d'iceux.

Fondation
faite par
Monsieur
le Bel Abbé
de Sainte
Geneuiève,
supprimée
par les Mar-
guilliers.

Pour ce qui concerne lesdites fondations, les defendeurs qui ont, contre l'intention dudit Abbé le Bel, conuertý le seruice qui deuoit estre fait à son intention, en vne petite Messe de Dimanche en faueur des Parroissiens, & en ont osté la connoissance à l'Abbé de Sainte Geneuiève, qui deuoit commettre avec le Curé, en la place des Chapelains decedez, pour la celebration dudit seruice; sont obligez de reestabli le dit seruice, ou renoncer à ladite fondation, estant iniuste que ladite conuersion ait lieu au mespris de la disposition dudit defunct, & contre la volonté de ses successeurs Abbez, ausquels il a expressément desiré donner ladite nomination, afin de ne permettre pas qu'on fist iniure à sa memoire, en se seruant de ses deniers à autre effet que pour faire les prieres qu'il a ordonné estre faites pour le repos de son ame: si la bonne foy qui doit estre gardée particulièrement en des contrats de telle consequence, qui ont esté agreez par les anciens Marguilliers de Saint Estienne, ne le peut estre du consentement des defendeurs, elle le doit estre par la rigueur de la loy; *Bona fides enim contractus conuentionis legem seruari exposcit.*

Fondation
par Mon-
sieur Fou-
lon Abbé
de Sainte
Geneuiève
des Predi-
cations de
Careme.

Et le mesme de la fondation aussi faite par l'Abbé Foulon, par ledit contract cy-deuant dit, contre lequel, parce qu'il est dit, que les Marguilliers presenteront deux Predicateurs audit Abbé pour eslire celui des deux que bon luy semblera, & en l'absence d'un Abbé Commendataire que le Prieur (Clausral) feroit ladite eslection; les defendeurs ont calomnié la memoire dudit defunct, & luy ont fait son procez comme à vn incestueux spirituel; ce sont leurs termes par leur dit inuentaie; d'autant, disent-ils, qu'estant Abbé de Sainte Geneuiève & Curé de Saint Estienne, il auoit la mere & la fille, & qu'en se faisant il n'auoit pû faire les fructs siens de ladite Cure, & partant ladite fondation estoit vne restitution de ce qu'il auoit pris; de sorte qu'ils se sont rendus parties, tesmoins, & iuges en ladite condamnation: & en ce faisant ont voulu iuger la mesme chose à l'égard dudit le Bel, qui auoit aussi eu en mes-

me temps ladite Abbaye avec la Cure Sainct Estienne, & le tout à ce seul dessein d'aneantir tout ce qui concerne lesdits droicts de ladite Abbaye, & sans considerer que lesdits Abbez estoient dispensez du sainct Siege pour tenir ladite Cure Sainct Estienne, & que ladite fondation a esté gratuitement faite par ledit Abbé sans autre veuë que celuy du zele de sa pieté, ne preuoyant pas que les Marguilliers qui l'ont acceptée avec ces clauses & conditions, eussent des successeurs si ingrats que de la calomnier, quoy que ce soit par disposition de droict, *ab initio donanti fuit liberum arbitrium legem rei suæ imponere, ut necessario seruetur.* Si les defendeurs y resistent, ladite fondation doit demeurer pour le tout sans effect, parce que les clauses & conditions d'un contract sont parties substantielles du contract.

Après ladite calomnie ont produit lesdits defendeurs en leur seconde production vn Arrest du Parlement de Paris, du dernier de Ianuier 1568. qui est la huitiesme piece de ladite production, par lequel ledit Abbé a esté condamné à contribuer pour moitié à la retribution des Predicateurs de ladite Parroisse Sainct Estienne, & en inferent que la rente de deux cens liures par luy donnée pour le Predicateur du Careme, est vne restitution & acquit de ce qu'il deuoit à ladite Parroisse; mais obrepticement ils taisent la verité dudit Arrest, parce que par iceluy les Marguilliers estoient obligez de faire la queste pour le Predicateur, & au cas qu'il ne se trouuast suffisamment pour ladite retribution, le Curé & lesdits Marguilliers sont condamnez de suppleer au surplus, chacun d'iceux pour moitié.

Obreption
du content
en vn Ar-
rest du Pa-
lement.

Et de plus, que les mesmes Marguilliers ont iustifié par les comptes qu'ils ont produits, que déduction a tousiours esté faite audit Abbé Foulon sur les Obits qui luy appartenoient, de ce qui auoit esté payé pour luy audit Predicateur en ladite qualité de Curé: mais ce qui est de plus estrange, touchant la calomnie deuant dite, est que les defendeurs ont reconnu par le moyen du compulsoire qui a esté fait des registres de ladite fabrique, suiuant le procez verbal qui en est produit sous la cote F, que les predecesseurs d'iceux Marguilliers honorans la memoire dudit Abbé Foulon, y ont fait cette obseruation. *Nota qu'il faut voir la fondation pour les Sermons du Careme, afin de faire re-commandation pour les prieres qu'il conuient faire pour ledit Abbé; & par consequent tout ce qui a esté dit par les defendeurs ne porte autre force que des suppositions en vne cause qui deuoit estre traitée sans artifice, & sans autre veuë que de faire connoistre le merite du differend des parties: c'est ce que les demandeurs pretendent faire à leur égard, & n'ont autre intention que la conseruation de leurs droicts, pour la plus grande gloire de Dieu, à l'édification des gens de bien; & n'a ledit Abbé Coadiuteur entrepris de porter le Sainct Sacrement à ladite Procession solemnelle que pour ce suier, & obeir aux Decrets & Constitutions de sa Saincteté, rapportées en ces termes par l'auteur qui en est compulsé: *Non deferatur tabernaculum Sanctissima Eucharistia Sacerdotum humeris, sed manibus tantum celebrantis, non obstante qualibet contraria consuetudine quam abusum esse declarauit sacra rituum congregatio. die 2.**

Reconoi-
sance des
anciens
Marguil-
liers en fa-
ueur de
Monsieur
Foulon
Abbé.

Decret de
nostre S.
Pere le Pa-
pe pour la
Procession
du Sainct
Sacrement.

Iunij 1618.

C'est pourquoy si les defendeurs eussent eu cette consideration, & n'eus-

Difference
des droits
Episcopaux
& des
droits de
Superiorité
& de Pa-
tronage.

sont point eu recours ausdites suppositions, ils eussent iugé que les droicts Episcopaux qui sont prescrits audit sieur Archeuesque en l'Eglise de Saint Estienne exempt & priuilegiée, sont du tout differens de ceux qui appartiennent aux demandeurs, tant en consequence de ladite superiorité que du droict de Patronage Ecclesiastique; parce que pour ce qui regarde ledit sieur Archeuesque lesdits droicts consistent suiuant le Canon, *Perlectus. dist. 25. Ad Episcopum pertinet Basilicarum consecratio, unctio altaris, & consecratio chrismatis, ipse predicta officia & ordines Ecclesiasticos distribuit*, &c. encores ces droicts peuuent-ils appartenir à vn Abbé exempt, comme ils appartiennent par priuilege à l'Abbé de Sainte Geneuiéue, suiuant les bulles qu'ils en ont produites; & au regard desdits Abbé & Religieux ils ont en suite de ladite Superiorité, tant sur le Curé Religieux, qu'en ladite Eglise Curiale & Reguliere toutes sortes de direction & prééminence; & en qualité de Patrons Ecclesiastiques, l'autorité de connoistre de la police de ladite Eglise, de prendre garde aux actions & déportemens dudit Curé, tant pour ce qui concerne les mœurs que pour la conseruation des bastimens, suiuant la disposition du c. *pie mentis. 16. qu. 7.* tellement qu'il ne faut pas croire que ces droicts qui sont controuersez par les defendeurs regardent en quelque sorte que ce soit l'intérest dudit Archeuesque de Paris.

Visite faite
par l'Abbé
de Sainte
Geneuiéue
des Eglises
dépendan-
tes de ladi-
te Abbaye.

Et parce que lesdits sieurs Abbé & Religieux sont obligez de conseruer les droicts de ladite Abbaye contre l'inuasion dudit Curé & Marguilliers, qui l'entreprennent au preiudice & nonobstant les censures contenuës par les bulles de sa Saincteté, ils ont iustifié les droicts de leur dite superiorité, & la possession immémoriale d'iceux; entre lesquels sont aussi les droicts de visites és Eglises dépendantes de ladite Abbaye, en ce qui ne concerne point celle des Saints Sacremens, qui appartient audit sieur Archeuesque, & y ont lesdites visites tousiours esté faites par les predecesseurs dudit sieur Abbé ou leurs Commis, comme il est iustifié par vn acte du 22. Septembre 1449. piece onzième, produite sous la cotte C de la premiere production desdits demandeurs.

Prouision
de l'Office
de Clero de
l'Oeuure
par l'Abbé
de Sainte
Geneuiéue.

Et dautant aussi que les defendeurs ont dit tant par leur inuentaie que par leur dite Requête, que les Clercs de l'œuure & fabrique de l'Eglise Saint Estienne n'ont point esté instituez par l'ordre desdits Abbez, iustifient les demandeurs le contraire par le moyen de ce que sous ladite cotte C, ils ont produit, piece 21. de ladite cotte, des lettres de prouision données par l'Abbé Sainte Geneuiéue le 15. Decembre 1538. de ladite charge de Clerc & Tresorier dudit œuure & fabrique à Maistre Martin Vallet, & sont lesdites prouisions fondées en consequence de ladite superiorité; les termes en sont notables, *Nostræ parochialis Ecclesiæ Sancti Stephani, infra septa dicti Monasterij situatæ, cuius institutio ex antiquo ad nos atinet & spectat*, & en estoient les Marguilliers de ce temps d'accord; & n'y a iamais eu que ceux d'à present qui ayent attenté lesdites entreprises, & qui se soient opposez à la verité desdits droicts, & à cette fin recelé les anciens titres de ladite fabrique, pour empescher la preuue de ladite possession, quoy que quand les demandeurs n'en auroient point iouy, lesdits defendeurs ne s'en pour-

roient pas preualoir pour en inferer vne prescription, attendu que ladite institution de Clerc de l'œuvre fait partie dudit droit de superiorité, lequel jamais ne peut estre prescrit de la part des suiets au Superieur, comme il est remarqué par le chapitre *Cum licent. de prescript.* Et ne peut ledit sieur Archeuesqueleur en donner la faculté pour deux raisons; la premiere, que luy mesme n'a pas ladite superiorité procedant de ce que ladite Cure est membre de ladite Abbaye, & suiette au Patronnage d'icelle; La seconde, que quand elle dépendroit de l'Euesché de Paris (ce qui ne fut jamais) seroit en ce cas ledit droit attaché à la personne dudit sieur Archeuesque, & non transmissible ausdits Marguilliers, qui sont personnes purement laïques, sans autres droits que ceux concernans l'administration du reuenu de ladite fabrique; & ne pourroit pas aussi ladite superiorité estre transmise audit Curé Religieux pour l'exempter de ses Superieurs, desquels il est de droit perpetuellement obedientaire, & ne tient dudit sieur Archeuesque que le droit de fonction spirituelle, de sorte que les procedures des defendeurs sont de toutes parts iniustes.

Quant aux conclusions particulieres des demandeurs contre Monsieur l'Archeuesque, à ce qu'il soit tenu faire son entrée en ladite Abbaye, y donner un drap d'or ou de prix notable, & quatre deniers d'or, & y faire le serment ordinaire, sçauoir est, qu'il n'entreprendra point sur les droits, priuileges, franchises, immunités, & exemptions d'icelle Abbaye; elles sont fondées en l'obligation de ladite redeuance, ainsi que les Euesques de Paris predecesseurs dudit sieur Archeuesque l'ont reconnu, par le moyen de ce que successiuellement ils y ont satisfait, sur les remonstrances à eux faites par les Abbez & Religieux de Sainte Geneuiève, qu'ils y estoient obligez, ainsi que les actes produits à cette fin par lesdits demandeurs, concernant ladite redeuance, le iustifient.

Demandes
contre M^{rs}
sieur l'Ar-
cheuesque
de Paris.

Ioint qu'elle est de plus iustificée par les anciens titres du tresor de ladite Abbaye, comme se voit par le procez verbal du compulsoire qui en a esté fait à la requeste des demandeurs & par eux produit, par lequel fol. 1. verso est vn extraict d'un desdits registres de l'an 1381. qui contient ces termes: *Quand l'Euesque de Paris vient du Sacre de l'ancienne coustume tousiours gardée, les Chanoines de Nostredame ne le reçoient point, si les Religieux de Sainte Geneuiève ne leur liuroient.* Et au feüillet 2. recto, apres qu'il y est fait mention des ceremonies obseruées en faueur dudit sieur Euesque, il est dit que l'Abbé & Prieur le conduisent à l'Autel, & qu'il offre un drap de soye qui doit estre precieux & solennel.

Obligation
du sieur Ar-
cheuesque
de Paris de
donner vn
drap d'or.

Et au 4. feüillet recto sont encor ces termes, *Consurgit & precedentibus candelabris, cumque comitantibus hinc inde Abbate & Priore, progrediens ad altare facit oblationem suam, offerens super illud unum pallium aureum quod debet esse pretiosum pariter & solenne: Nam ad hac tam ille quam omnes alij Parisienses Episcopi, in huius solemnitatis nouitate tenentur perpetualiter.* Et en suite touchant ledit serment, y est déduit tout ce que les Euesques de Paris sont aussi tenus d'observer; ce qui a esté exactement accompli par ses predecesseurs, & nommément par Messieurs les Cardinaux de Gondy & de Rets mediat & immediat, oncle & frere dudit sieur Archeuesque: Tellement que ce n'est pas

Serment
que doit
faire ledit
sieur Ar-
cheuesque.

vn droict de pure faculté, comme il pretend par la requeste présentée au Roy & à son dit Conseil, pour s'excuser dudit droict. Et quand en son establissement la cause d'iccluy n'auroit autre fondement que la pieté de sesdits predecesseurs, la continuation du payement de ladite redevance faite à l'Eglise de la Patrone de Paris, est suffisante pour en induire vne obligation perpetuelle, *fauore religionis*, mais il paroist par ce qui a esté dit, que c'est vne pure obligation, à laquelle les premiers Euesques de Paris se sont soumis par droict d'hommage & action de grace à la diuine Prouidence, de les auoir esleuez au Trosne Episcopal de la ville capitale de France, & pour obtenir l'intercession de celle que les habitans de ladite ville ont prise pour leur dite Patrone.

Arrest du
Parlement
touchant la
redevance
d'un drap
d'or à l'E-
glise Ca-
thedrale de
Senlis.

Et n'est pas ladite redevance sans exemple, Messieurs les Euesques de Senlis sont aussi obligez de payer vn drap d'or aux Chanoines, Doyen & Chapitre de l'Eglise dudit Senlis, à cause de leur entrée & installation audit Euesché; ce que feu Monsieur Roze Euesque de Clairmont, qui auoit esté Euesque dudit Senlis, ayant refusé de faire, par Arrest rendu au Parlement de Paris le 3. Septembre 1611. *il fut condamné payer ausdits Doyen & Chanoines un drap d'or pour ledit droict d'entrée & installation, conformément à ce qui auoit esté obserué par ses predecesseurs Euesques, si mieux n'aimoit ledit sieur Roze payer la somme de quarante liures parisis d'une part, & huit cens liures d'autre, pour estre le tout employé à la decoration & ornement de ladite Eglise, & auroit de plus esté condamné es dépens de la cause principale euocquée du Iuge de Senlis, & de la cause d'appel audit Parlement.* & sont encores obligez Messieurs les Euesques de Senlis, de payer pareille redevance aux Chanoines de l'Eglise Collegiale Saint Rieulle Patron de ladite ville, & y ont tousiours satisfait; mesmes Monsieur le Cardinal de la Rochefoucault depuis quelques années en ça que les Chanoines de ladite Eglise luy en ont fait la demande.

C'est pourquoy de toutes parts ledit sieur Archeuesque n'a point de legitime pretexte pour s'exempter de ladite prestation, puis qu'en fait semblable ledit sieur Roze y a esté contraint sur la seule consideration que sesdits predecesseurs auoient fait ledit payement.

J. Arual

Monsieur DE MONTESCOT Rapporteur.

